

Auauna Atu i le Faleteuoloa

*“E fesoasoani tagata uma o le Ekalesia i le tasi
ma le isi, o lea e leai se tasi o i tatou e fiaai.”*



Saunia e Christine Merrill
(E faavae i se tala moni)

O leni tala sa tupu i le ISA.

Sa oso Dominic i totonu o le taavale ma fusi lona fusipau. “O fea ta te o i ai?” na ia fesili atu ai i lona Tina.

“O le a ta o e auauna atu i se tasi,” o le tala lea a Tina. “E manaomia e se aiga le fesoasoani i le mauaina o ni meaii.”

Sa la tietie atu i se fale tele efuefu. E le’i oo muamua lava Dominic iina.

“O le a leni nofoaga?” na ia fesili ai. “Sa ou faapea o le a ta o i le faleoloa e aumai ni meaii.”

Sa tapuni e Tina le faitotoa o le taavale. “Ua ta’ua o se faleteuoloa a epikopo. E pei lava o se faleoloa, sei vagana ai e te le tau totogia meaii iinei.”

Na faaatoatoa le pupula a Dominic. “E avefua mea uma?”

“O se mea lava faapena,” sa fai atu ai Tina. “A tatou anapopogi, e mafai ona tatou totogia se taulaga anapogi, e pei lava o le auala tatou te totogai le sefulu. O lena tupe e fesoasoani e faatau ai meaii e alu i totonu o leni faleteuoloa. Ma a le lava se tupe a se tasi mai le lotu, e mafai ona latou talosaga atu i le epikopo mo se fesoasoani ma sau iinei e avatu ai mea latou te manaomia. I nofoaga e leai se faleteuoloa, e i ai isi auala a le epikopo e fesoasoani ai.”

Sa savavali atu Dominic ma Tina i le faitotoa. “O lea la, o le aiga o loo ta fesoasoani i ai i le asō e le lava ni tupe e faatau ai ni meaii?”

“E le o le taimi nei,” o le tala lea a Tina. “Ae o le mafuaaga lena o loo ta fesoasoani i ai!

E fesoasoani tagata uma o le Ekalesia i le tasi ma le isi, o lea e leai se tasi o i tatou e fiaai.”

Sa lue atu le ulu o Dominic. “Ou te fiafia o le a mafai ona latou maua ni meaii.”

“Faapena foi a’u. “Ia ta o loa! O le a ou faaali atu ia te oe le auala e fai ai.”

Sa savavali atu Dominic ma Tina i totonu o le faleteuoloa. Sa i ai laina o fata e eseese mea sa i ai, e pei o se faleoloa.

Sa toso mai e Tina se pepa mai lana ato. “Ua ta’ua leni mea o se ‘oka meaii.’ O se lisi o mea e manaomia e le aiga. Sa galulue faatasi lo tatou epikopo ma le Peresitene o le Aualofa e fesoasoani ia i latou e fai le lisi.”

“E te faaagaina i taimi uma se lisi pe a e faatau foi, Tina!” Na fai atu ai Dominic.

“E sa’o! O le a ta faamautinoaina ia maua mea uma i luga o le lisi ina ia maua e le aiga mea latou te manaomia.

Sa maua e Tina se taavale faifaatau. Ona fesoasoani lea o se volenitia ia i la’ua e sue mea o loo i luga o le lisi. Sa tulei e Dominic le taavale faifaatau a’o tuu e Tina mea i totonu.

“Ua lelei, ou te manatu ua uma ta’ua!” Sa toe tilotilo Tina i le lisi. “Sei ta faamautinoaina ua i ai mea uma. “Sa ta aumaia ni fa’i?”

“Ioe!” Na fai atu ai Dominic.

“Falaoga?”

“Ioe!”

Ina ua uma, sa fesoasoani le volenitia ia i la’ua e tuu meaii i totonu o le la taavale. Sa talotalo faatofa atu Dominic.



**O le a se mea e mafai
ona e faia e fesoasoani
ai ia i latou e
manaomia se mea?**

“O le a sou faalogona?” Na fesili atu ai Tina ao la o atu i le fale.

“Lelei tele!” Na fai atu ai Dominic. “Ae . . . e le lelei tele foi.”

Sa te’i Tina. “Aisea ua e lagona e le lelei tele ai?”

“Ona o le vaai o na meaii uma na ou fiaai ai! E mafai ona fai le ta meaii o le aauli pe a ta o i le fale?”

Na ataata Tinā. “Ae a!” O se tagata faigaluega malosi e pei o oe e manaomia foi ni meaii.”

Sa toe ataata atu ia Dominic. Sa ia lagona le fiafia mo le fesoasoani i se tasi i le asō. ●